



Trideset i peti hadis: Vrijednost sura El-Bekare i Alu 'Imran

Prenosi se od Ebu Umame El-Bahilija, radijallahu anhu, da je rekao: „**Čuo sam Vjerovjesnika, sallallahu alejhi ve sellem, da kaže: „Učite Kur'an, jer će on na Sudnjem danu doći kao zagovornik onima koji ga budu učili. Učite Zahravejn, El-Bekare i Ali 'Imran, jer će one na Sudnjem danu doći kao dva oblaka ili kao dva jata ptica raširenih krila koje štite onoga ko ih je učio. Učite suru El-Bekare, jer je njeno učenje bereket (blagoslov), a njeno zapostavljanje gubitak. Protiv nje El-Betale ništa ne mogu.**“ (Bilježe Muslim, Ahmed i drugi. Rekao je Mu'avija ibn Selam da se pod riječju „El-Betale“ misli na sihirbaze.)

Komentar:

Prvo, metodološki hadis ide od opšteg ka posebnom. Prvo, naređeno je učenje Kur'ana i ono je povezano sa šef'atom. Zatim su izdvojene „Zahravejn“, a za njih se veže odsustvo teške žege na Sudnjem danu onome ko ih bude učio, zbog njihovog zauzimanja za njega. Zatim je izdvojena Bekara, i za nju se vežu tri stvari: prvo, „**njeno učenje je bereket, blagoslov**“, tj. ko je bude prihvatio, kontinuirano učio, razmišljao o njenim značenjima i radio po njoj, dobiće veliku korist. Drugo, „**njeno zapostavljanje je gubitak**“, tj. veliko kajanje na Sudnjem danu, kao što je došlo u hadisu: „Ni za čim neće tugovati stanovnici Dženneta, osim za trenutkom koji je prošao a da nisu spominjali Allaha u njemu“. Treće, „**protiv nje El-betale ništa ne mogu**“, tj. ne mogu dostići njenu vrijednost, ne mogu je savladati sihirbazi, zato što je ono sa čime oni dolaze „batil“ laž, pa ne mogu biti kadri da je nadvladaju. Može se još i reći da nisu u stanju da je upropaste, naude, kao ni onog ko je bude učio, kao što kaže Uzvišeni Allah: „**ali nisu mogli time nikome bez Allahove volje nauditi.**“ Bekara, 102.

Drugo, riječ „ili“ koja je došla u hadisu, kako kažu učenjaci, može da znači sumnju prenosica, a može značiti i izbor u poređenju ove dvije sure. Preče je da je to to zbog podjele onih koji uče, zato što je to govor Poslanika sallahu alejhi ve sellem, a ne dvoumljenje prenosilaca, jer se ravije slažu u pogledu oblika hadisa.

Rekao je Tibij: „Može značiti kategorizaciju učača. Prvi, oni koji ih budu čitali, ali ne razumiju njihova značenja. Drugi, oni koji su spojili i njeno učenje i razumijevanje. I treći, oni koji podučavaju druge njihovom učenju i razumijevanju. Ovo je bliže ispravnom, Allah najbolje zna.

Treće, rekao je Tirmizi, rahmetullahi alejhi: „Značenje ovog hadisa kod učenjaka je da on ukazuje na nagradu učenja Kur'ana. Tako su učenjaci protumačili ovaj hadis, i slične njemu. U hadisu kojeg prenosi Nevas radijallahu anhu od Vjerovjesnika sallahu alejhi ve sellem: „Sljedbenici Kur'ana su oni koji su radili po njemu na dunjaluku“, ukazuje se da hadis sadrži i sevabe za rad po Kur'anu.

Četvrto, onaj koji nije u stanju da nauči napamet cijeli Kur'an, neka nauči suru Bekare i Ali-'Imran, zbog velike nagrade koje one donose, i mnoštva propisa koji se nalaze u njima. Kao što govore učenjaci: „U suri Bekara se nalazi hiljadu naredbu, hiljadu zabrana, hiljadu propisa i hiljadu obavijesti.“